


Favorito a bira Supermercado di 5 strea



ORANJESTAD (AAN): Ayera a tuma lugar e apertura oficial di e edificio nobo di Supermercado Favorito, cual porcierto ta un joya di edificio, tanto paden como pafor. Den un entrevista cu DIARIO a sostene cu Casper Helmeyer, el a duna un relato di e historia exitoso di e supermercado aki cu enberdad a bira favorito di hopi.

Na 1987 ora cu Supermercado Victoria a bati bancarota, famia Helmeyer consistiendo di Casper Lowrens Helmeyer, Casper Helmeyer y e ruman Oscar a tuma over e lugar y cu un campaña di relacion publico a logra pone nan clientenan haya confianza y cambia e nomber pa Supermercado Favorito. Nan a percursa pa semper nan ta bon surti.

Nan clientela a subi, mustrand cu e supermercado a haci un bon impacto y e esfuerzo di e famia a saca su frutonan. Nan clientela a sigui bira grandi te na dado momento a mira cu e lugar pa haci compras a bira un tiki preta.

Pa reduci e presion un poco a dicidi di habri nan portanan riba Diadomingo pa mitar dia. Pero clientenan a keda indica cu lugar ta chikito.

Segun Casper Helmeyer a declara na DIARIO, riba esaki e plan di expansion di e supermercado a nace, y den 10 luna di tempo e lugar a keda cla. Supermercado Favorito cu antes tabata tin 454 meter cuadra, a bira awor 1.120 meter cuadra. Naturalmente e cuerpo di empleado tambe a crece y nan ta conta cu 27 empleado awor.

Como algo unico, entrante awe Supermercado Favorito ta ofrece clientenan e oportunidad pa paga cu tarheta di credito Visa tambe, segun Helmeyer a declara den e entrevista cu DIARIO. Ademas, e supermercado ta famoso na Aruba pa su rifa anual di un auto. Esaki tabata e gran campaña cu tur hende ta su tras. Pa fin di e aña aki, nan lo ta rifando pa di cuatro vez consecutivo un auto, y e biaha aki un Nissan Sunny B-12.

Favorito tin e servicio "A Domicilio" cu ta dos biaha pa dia henter siman, y costo pa esaki ta 250 florin so. Favorito tabata e pionero na Aruba tambe pa bini cu servicio riba Diadomingo, y tambe e "service night" tur Diabierna y Diasabra anochi te 8:00 p.m.

Su parti di carniceria ta hopi bon comenta. Carninan importa for di

Argentina, Brasil, y Costa Rica semper ta fresco y e sistema cu nan tin den uso ta garantiza cu nunca e carni ta worde exponi na calor, segun Helmeyer a relata na DIARIO. E specialnan di tur fin di siman cu sali den DIARIO, segun a ser splica, ta enberdad specialnan unda ningun otro negoshi por competi cu nan.

Favorito a logra expande danki na ayudo di First National Bank, kende a demostra di tin confianza den economia di Aruba. Un biaha mas, pabien na Supermercado Favorito y nan clientela, kendenan awor ta bay goza di un supermercado mas amplio pa haci compras.

Ayeratardi un publico basta grandi a asisti na e apertura, y a haya oportunidad pa desea famia Helmeyer y personal di e supermercado tur clase di exito. Yiu muher di Casper Helmeyer tabata tin e honor pa efectua e inauguracion oficial, door di primi riba un boton. Riba e combinacion di potretnan por mira con e atardi a progresa.



FAVORITO A BIRA MAS FAVORITO

ORANJESTAD (AAN): Ayera den oranan di atardi, e supermercado a bira Favorito a bira mas Favorito cu e inauguracion di su expansion pa asina brinda mas comodidad y necesidad na su clientela.

Casper Helmeyer den su discurso a bisa: "Cu awe mi ta para akinan, tin su historia. Un historia cu por worde cualifica como uno di casualidad, perseverancia y di confianza."

"CASUALIDAD; pasobra na edad joven mi a sigui e pasonan di mi tata, cu tabatin no menos cu 45 aña den e mundo di supermercado, y te cu e dia di awe, no a laga e mundo aki, y cu tur dia ta un sostén moral pa nos. PERSEVERANCIA; pasobra nos tata a siña nos for di chikito cu pa bo logra algo den bida bo tin cu studia, traha, tuma riesgo, carga responsabilidad, y crea un mentalidad di "never give up". CONFIANZA; e ingrediente, e aspecto, e parti cu nos mayornan a duna nos, nan tabatin confianza den nos y nan a siña nos e bator di tin confianza propio."

El a manda un palabra di elogio y gratitud pa Carlos Dania Contractors, e compania cu a percursa pa e construccion. Wimco, Sr. Williams y su empleadonan, Cecon N.V., y na tur cu di un manera of otro a contribui na e proyecto aki.